



BARINGKUAS

REBOLUSYONARYO A DYARYO TI UMILI ITI CAGAYAN VALLEY

TAWEN 2002 BLG. 2

ISYU TI ABRIL - HUNYO

P10.00



Editoryal

Labanan dagiti kontra-umili a patakaran ken programa! Padisien da GMA ken Gob. Faustino Dy, Jr!

Gloria Macapagal-Arroyo (GMA) ken Faustino Dy, Jr. Agpada nga aso-aso dagiti imperyalista. Agpada a napeklan a kontra-rebolusyonaryo. Agpada a kontra-umili.

Idi Hunyo 7, naisayangkat ti tignay protesta ti umili iti rehiyon laban iti panagturay da. Impanawagan da ti panangpadisi iti poder da GMA ken Gob. Dy. Napateg a tignay pangpulitika. Narimat a balligi ti tignayan masa.

Tarigagay ti nalawa nga umili a labanan ken padisien ti rehimen ni Macapagal-Arroyo. Ken ti lokal nga agari-ari a pamilya Dy iti Isabela.

Nainkalinteg la unay a labanan ti agdama a reaksyonaryo a rehimen a mangibaddebaddek kadagiti demokratiko nga interes ti umili.

Maituloy iti panid 3

LINAON

EDITORIAL

1 Lablabanan ti umili ti agdama a turay da GMA ken Gobernador Faustino Dy

PULITIKA

5 Faustino Dy, Jr.: Diktador ken pasista ti Isabela

8 Ti pannakidangadang ti umili iti Hacienda San Antonio - Santa Isabel

ARMADO A DANGADANG

10 Nagragsak ti umili iti pannakadusa ni Mayor Jesus Sebastian

12 Kasano a naipagballigi dagiti gerilya ti panangdusa kenni Mayor Sebastian?

PASISMO TI ESTADO

15 Sinno ti pudno a terorista?

TIGNAYAN TI AGTUTUBO

17 Ti pakasaritaan ni Ka Jonas, maysa a kameng ti Batang Huwaran

19 Ti nadur-as a panagorganisa kadagiti ubbing iti probinsya ti Quirino

DAMDAMAG ITI CAGAYAN VALLEY

20 Agreb iti Daya a Cagayan; **21** Ti panangrribuk ti AFP ken CAGU iti Laud a Cagayan; **24** Ti panangipaidam ti serbisyo a salun-at iti Isabela; **26** Martsa-rali kontra Gob. Dy; kdpv

SALUN-AT

29 Mainaig iti panagariek

IBANAG

30 Mekasiyam nga parte na Espesyal nga Kursu na Kusechero: Y rehimen ni Ramos anna danuri kontra-kusechero nga programa na

KULTURA

30 Daniw ni Ka Lena: *NATURED KA KADDUA*

KOMIKS

30 TANO

HUNYO 7, 2002: NAGBARINGKUAS TI UMILI KONTRA ITI KUMPLOT A COJUANGCO-ARROYO-DY



Labanan ti panagmula ti Bt corn!



Irupir ken ilaban ti karbengan iti daga!



Suppiaten ti cassava plantation project! Labanan ti panagagum ti kumplot a Danding Cojuangco ken Faustino Dy, Jr!

Manipud panid 1

Ti lokal a dangadang kontra ken ni Dy ket rumbeng a nairut nga isilpo iti dangadang ti umili a padisien ni GMAiti tukad pagilian.

Namnamaen ti Partido ken ti Bagong Hukbong Bayan (BHB) a dagiti panagtignay ket agtultuloy pay a lumawa ken pumigsa.

Tapno magun-od daytoy, irussuat dagiti dadakkel pay a tignay protesta babaen ti militante ken sustenido a demonstrasyon masa.

Talmegan ti panangawis ken palawaen ti pannakikaykaysa kadagiti dadduma pay a demokratiko ken progresibo a puersa. Umad-adu ti bilang dagiti agparang a grupo ken individual a lumablabaen iti panagturay da Arroyo ken Dy. Ipursigi pay ti panangawis iti akintengnga a puersa, patriyotiko a negosyante, propesyonal, tao ti simbaan, ken estudyante.

Irussuat dagiti asembliya ken forum kadagiti eskuelaan, simbaan, ken iti aw-away. Ipaawat dagiti pananggundaway ti agdama a turay. Ti kinaaso-aso da iti imperyalismo a US. Ti kinadangkok da. Ti kumarkaro a pananglipit da iti umili. Ken ti kinapateg ti panagorganisa ken militante a panagtignay.

Ibulgar ti kinaawan bain ni GMA iti panangitandudo ti armado a pannakibiang ti US iti pagilian. Ipakita ti kinaberduo na. Pinairteng na ti all-out war laban iti rebolusyonaryo a tignayan. Naan-anay nga inrikepnan ti tungtongan a kappia.

Nairut a tungtungpalen na dagiti imposisyon ken mandar dagiti imperyalista kas ti deregulasyon, pribatisasyon ken liberalisasyon. A lallalo laeng a mangilumlom ti kaaduan iti kinarigat.

Awan bain nga itantandudo na ti interes dagiti napeklan nga agum ken kurakot a patron ni Estrada - ni Danding Cojuangco. Dagdagus nga inendorso na ti manangagum a proyekto a cassava ti agkakumplot a Danding Cojuangco ken Gob. Dy.

Iti lokal a tukad, lalo nga ipursigi ti panangibulgar iti kinaaso-aso ni Dy kadagiti imperyalista ken iti patron na a ni Danding Cojuangco. Ibulgar ti kinaranggag ken kinadangkok na. Labanan dagiti kontra-umili, kontra-mannalon a patakaran ken programa na.



Labanan ken suppiaten dagiti proyekto nga agag-agum ti daga. Nangruna ti cassava plantation project, ti coal mining ken coal-fired power plant. Magat Dam Development Project. Kasta met a suppiaten dagiti kontra-umili nga addangen kas ti panagserra kadagiti ospital.





**Bayat a
maipatpatungpal
dagiti dangadang
laban kenni GMA ken
Dy babaen iti
natalna ngem
militante a tignay
protesta kadagiti
sentro nga ili ken
syudad, pagig-
iggeman ti Partido,
BHB ken
rebolusyonaryo nga
umili ti agtultuloy a
panangpairteng ti
armado ken gerilya a
pannakidangadang**

Labanan ken suppiaten dagiti proyekto nga agag-agum ti daga. Nangruna ti cassava plantation project, ti coal mining ken coal-fired power plant. Magat Dam Development Project. Kasta met a suppiaten dagiti kontra-umili nga addangen kas ti panagserra kadagiti ospital.

Rumbeng ngarud nga ikonsentra ti dangadang kontra iti panagturay da. Ited amin a kabaelan ken pigsa tapno maibulgar, ken mapaay dagiti kontra-umili a gandat da. Agingga't naan-anay a maisina ken marebbek ti panagturay da.

Bayat a maipatpatungpal dagiti dangadang laban kenni GMA ken Dy babaen iti natalna ngem militante a tignay protesta kadagiti sentro nga ili ken syudad, pagig-iggeman ti Partido, BHB ken rebolusyonaryo nga umili ti agtultuloy a panangpairteng ti armado ken gerilya a pannakidangadang.

Agtultuloy ti panagbukel ti pigsa ti base a masa iti aw-away. Ti panangirussuat ti rebolusyon agraryo nga in-inot a mangpunas iti pyudal ken malapyudal a pananggundaway. Ken ti panagirussuat ti armado a dangadang.

Pagiggeman ti panagpaadu ti puersa. Panagirussuat kadagiti pagsasanay. Panagpalawa kadagiti erya a matigtignayan. Panagirussuat kadagiti taktikal nga opensiba a kabaelan nga iballigi.

Balballaagan ti rebolusyonaryo a tignayan ti rehimen US-Macapagal-Arroyo ken ti turay ni Gobernador Dy iti Isabela iti aniaman nga addang da nga agusar ti pasista a ranggas laban kadagiti umili a sumuppiat iti programa ken turay da.

Maibilang a lehitimo a target dagiti taktikal nga opensiba ti BHB dagiti tropa ti AFP, PNP ken CAGFU nga imobilisa ti gubyrno a Macapagal-Arroyo-Dy tapno lapdan ti panaglaban ti umili.

Bayat nga ipilpilit ti rehimen ken ti diktadura a Dy dagiti kontra-umili ken kontra-mannalon nga addangen, patakaran ken proyekto, sangsangoen dan ti pungtot ti agkaykaysa nga umili.

Lallalo a makita ti umili ti kinapateg ti militante a panagtignay. Kasta met a maawatan da ti pakasapulan iti pannakarebbek ti mananggundaway a sistema a malakolonyal ken malapyudal babaen ti armado a dangadang.

Maimatangan da nga awan sabali a salaknib ken sanggir da no di ti Bagong Hukbong Bayan. Awan sabali a pamuspusan no di ti panangarakup iti nailian-demokratiko a rebolusyon. **B**



FAUSTINO DY, JR.

Diktador ken Pasista ti Isabela

Napeklan a kontra-rebolusyonaryo ken kangrunaan a padrino ti kontra-umili a panagranggas ken panangilupit-lupit iti karbengan ti umili iti Isabela

Saanen a maanusan ti umili ti nakaro unay a pannakagundaway manipud iti ima ti butangero a gobernador. Idi Hunyo 7, impukkaw dan ti umuna a dalluyon ti panagkondenar ken panagsuppiat iti turay na. Iti pakasaritaan ti probinsya, kadaytoy man laengen a nagtignay da tapno maisina ken mapadisi iti poder ti warlord a gobernador.

ASU-ASO DAGITI IMPERYALISTA

Ni Gobernador Dy ti kapingetan a mangitantandudo kadagiti programa ken proyekto a mandar dagiti imperyalista.

Rinugyan nan ti panangipatungpal ti panagminas ti coal wenna carbon ken ti panangitakder ti coal plant. Proyekto daytoy ti Philippine National Oil Company (PNOC) ken dagiti ganggannaet a kapitalista.

Sakupen ti coal mining ti 24 a baryo iti agkakarruba nga ili ti

Cauayan, Benito Soliven, ken San Mariano. Mapatpatakyas itan dagiti mannalon iti Sinippil ken Villaluz iti Cauayan City.

Numero uno a tagasuporta daytoy kadagiti interes ti Monsanto, ti kadakkelan a korporasyon ti bin-i iti intero a lubong iti agdama. Impalubos na ti field-testing ti makasabidong a Bt corn iti laksid ti panagsuppiat dagiti umili.

Para kenni Dy, awan pateg dagiti resolusyon dagiti konseho ti probinsya ken munisipalidad ti Ilagan mainaig iti panangiparit ti field-testing ti Bt corn.

Naparpartak pay ngem alas kuatro iti panangipatungpal na iti mandar ti IMF ken WB. Inserra na ti sangapulo nga ospital a pangpubliko.

UTEK ITI NASAKNAP A PANAGAGUM

Dadakkel a proyekto ni Dy, dadakkel a kaso ti panagagum.



Danding: padrino ni Junior Dy

Duapulo a ribu nga ektarya iti coal mining. Rinibu nga ektarya iti Magat River Sustainable Development Project. Ken dadduma pay.

Kakumplot na ni Danding Cojuangco. Ag-agumen da ti 150,000 ektarya para iti plantasyon a cassava. Madisloka ti sumurok-kumurang 30,000 a mannalon iti nasurok 12 nga ili

ti Isabela. Daytoy ti kadakkelan a kaso ti panagagum iti agdama iti pagilian.

Tinawid ni Faustino Dy, Jr. ti kinaagum. Ta daydi gobernador Faustino Dy Sr. nga ama na ti pimmapel idi agumen ni Danding Cojuangco ti Hacienda San Antonio-Santa Isabel idi 1979-1982

Tinawid ni Junior Dy ti kinaagum. Ta daydi Gobernador Faustino Dy Sr. nga ama na ti pimmapel idi agumen ni Danding Cojuangco ti Hacienda San Antonio-Santa Isabel idi 1979-1982.

Inaramid da ti amin a pamuspusan - panangallilaw ken panagranggas. Tapno maagum ni Danding ti 13,000 ektarya nga asyenda. Adu nga umili ti rinanggasan da. Tallo pulo ti natay a masa. Ngem saan da a nagballigi. Limmaban ti umili.

Agingga ita, itultuloy da latta ti panaggamrud da.

WARLORD KEN PASISTA

Awan nagdumaan da Gobernador Dy ken Gloria Macapagal-Arroyo. Butangero-butangera. Awagan da a “terorista”, “maka-NPA” wenno “maka-komunista” dagiti amin a kumontra iti addang da. Kadagiti proyekto na. Dagiti

lumaban ket kontra kano iti panagduras.

Dagus a tinubngar dagiti progresibo nga umili daytoy. Kinuna da, “saan a terorismo ti panaglaban iti panagagum da iti daga. Panangsalaknib iti aglawlaw. Panagsuppiat iti panagserra kadagiti ospital.”

“No iti panaglaban mi kadagiti kontra-umili nga addang ni Gobernador Dy, awagan na kami a maka-NPA ken komunista, sipupuso ken sidadayaw nga awaten mi daytoy. Nadaydayaw ti agserbi iti umili ngem iti kinabuklis,” indeklara da.

Berdugo ni Gobernador Dy. Target ti kinaranggas na dagiti akibista, lider masa, kameng ti progresibo nga organisasyon, tao ti simbaan ken propesyonal.

Inggabur na dagiti militar kadagiti lugar nga adda ti panagsuppiat ti umili kadagiti proyekto na. Ti 45 IB PA, 77 IB PA ken 118 Coy ti PNP iti cassava plantation project. CAFGU ken nasyon a tropa a militar iti coal mining project. Ken iti Jones.

Idadauluan na ti panagbukel ti Civilian Volunteer Organization (CVO) ken ti nasurok 200 nga ispesyal a CAFGU. Ninayunan na ti pondo ken armas dagitoy. Kiniddaw na pay ti pannakadeploy ti nasurok 200 a pueras ti Cordillera People's Liberation Army (CPLA). Amin ket mangbantay kadagiti proyekto na.

Iti panagsuppiat dagiti umili iti gakat na a pribatisasyon, dagdagus a sinuspendi na dagiti empleyado kadagiti ospital nga impaiserra na.

Isu ti utek iti panagserrek iti opisina ti Social Action Center ti Simbaan a Katoliko iti Isabela ken

opisina ti KARAPATAN-CV. Binutbuteng dagiti taw-an na iti AFP dagiti tao ti simbaan a Katoliko ken Protestante a mangitantandudo kadagiti interes ti mannalon.

Agtultuloy ti panagsisiim ken surbeylans kadagiti lider masa, tao ti simbaan ken dagiti aktibista a masa. Pinatay da ni Warlito Nagasao, maysa a lider masa iti Echague.



Awtokratiko a naiserra ti Bombo Radyo a nagdillaw kadagiti proyekto ti probinsya.

Saan tayon a masdaaw no ibaga na pay a panagdur-as ti hueteng, logging ken ibulsa da a pondo manipud iti “government projects”.

Saan a panagdur-as ti kayat a gun-oden ni Dy. Panangpespes ket di ti nayon a kinabaknang ken sobra a ganansya. Kakumplot dagiti dadakkel a burgesya kumprador ken dagiti korporasyon dagiti imperyalista.

Demokratiko a Rebolusyon

Demokratiko a rebolusyon. Daytoy laeng ti sungbat iti kinarigat. Daytoy ti pudno mangiwayat ti panagdur-as.

Saan a patauden dagiti mapangallilaw a proyekto. Kas ti cassava plantation project. Coal mining ken coal-fired power plant. Bt corn wenno Cauayan Agro-Industrial Economic Zone.

Nalawag ti programa a pang-ekonomiya ken pangpulitika ti rebolusyonaryo a tignayan. Para iti interes ti kaaduan nga umili.

Programa ti demokratiko a rebolusyon ti rebolusyon agraryo ken nailian nga industriyalisasyon. Ti libre a pannakaiwaras ti daga kadagiti awanan ken agkurkurang ti suksukayen. Agturong iti kolektibisasyon ti daga ken mekanisasyon ti panagsukay. Ti panangitakder kadagiti basaran nga industriya a mangpataud kadagiti pakasapulan ti umili.

Kanaig daytoy ti panangrebbek iti imperyalismo, pyudalismo ken burukrata kapitalismo. Iti panangrebbek iti panagturay dagiti ganggannaet a monopolyo kapitalista, dadakkel a burgesya kumprador ken dadakkel nga apot daga.

Demokratiko a rebolusyon ti mangrebbek iti sibubukel a turay ti imperyalismo, pyudalismo ken burukrata-kapitalismo iti pagilyan. Agraman ti dinastiya ken diktadurya ti pamilya Dy. **B**

Programa ti demokratiko a rebolusyon ti rebolusyon agraryo ken nailian nga industriyalisasyon. Ti libre a pannakaiwaras ti daga kadagiti awanan ken agkurkurang ti suksukayen. Agturong iti kolektibisasyon ti daga ken mekanisasyon ti panagsukay. Ti panangitakder kadagiti basaran nga industriya a mangpataud kadagiti pakasapulan ti umili.

Ti Pannakidangadang ti Umili iti Hacienda San Antonio - Sta. Isabel

Iti gandat ni Danding Cojuangco ken Gobernador Faustino Dy, Jr. nga agumen ti nalawa a dagdaga iti Isabela, babaen ti proyekto a cassava plantation, nasken a lagipen ken adawan ti adal ti narimat a pakasaritaan



Bukbuklen ti 13,085 ektarya ti dua nga asyenda. Hacienda San Antonio (11,000 ektarya) ken Hacienda Sta. Isabel (2,085 ektarya). Naipaima daytoy iti maysa a kompanya a Kastila, ti Compania General de Tabacos de Filipinas (TABACALERA) babaen ti pammalubos ti Ari ti Espanya idi 1882. Nadumaduma a nagsasaruno a henerasyon dagiti

inquilinos (tenants) ti nagtrabaho, nagsukay ken nagbayad kadagiti buis iti mano a dekada. Nakaro la unay ti kasasaad da.

Tunggal *inquilino* wenno tenante ket nakedngan a mangpataud ti 250 kilo ti tabako kada ektarya a sukayen na. Sakbay a mapalubusan a makamula ti mais,

pagay wenno mani wenno aniaman pay. Ti TABACALERA laeng ti mabalin a paglakuan kadagiti tabako. Isu met laeng ti adda karbengan a mangklasipika ti klase ti tabako. Kadawyan na, nababa la unay ti pananggrado da.

Ingkatlo ti bingayan. Pagkatlo ket mapan iti TABACALERA. Bingay ti mannalon ti mabati. Ti adat na, ibaklay dagiti tenante amin a gastos. Isu a kadawyan a mapasamak, agapan ingguddua ti bingayan. Naigalut da pay iti utang nga aganak ti 50% kada panagapit. No saan da a makabayad, agdoble pay ti anak na.

Ti laeng makapanam-ay kadagiti mannalon iti asyenda iti kastoy a nakaro a pananggundaway kadakuada ket ti kari a maipaima kano kadakuadan ti daga kalpasan ti sangagasut a tawen, iti tawen 1982.

Ngem ti 30,000 a mannalon a nabayag a nagur-uray iti pannakagun-od daytoy ket nakigtot idi maammoan da a dagiti dagdaga ket nainaganen iti kompanya nga ANCA idi Abril 1980.



Nainagan ken ni Antonio Carag, abogado ni Danding Cojuangco. Ngem ti pudno nga akinkukua ket ni Danding Cojuangco. Babaen iti pammalubos ni Marcos.

Idi inrupir dagiti mannalon ti kalintegan iti nasao nga asyenda, dua laeng ti imparang ti ANCA a pagpilian da. Ilako da ti kalintegan da iti daga iti balor a P2,000 kada ektarya ken pumanawen iti lugar. Wenno awaten ti kaguddua ti daga a suksukayen da. Libre ti titulo, makaawat pay ti tulong pinansyal. Ngem iti kondisyon a makikooopera da iti iskema wenno plano ti ANCA para iti Hacienda San Antonio-Santa Isabel.

Inusar da ti adu a pamuspusan tapno maallilaw dagiti mannalon. Dadduma a lider-mannalon ket naibyahe iti syudad. Pinakan, pinainom, impan da kadagiti balay-ragsakan.

Dagiti daulo ti komunidad ket kinatungtong ni Danding idi 24 Mayo ken 30 Mayo 1980 iti Manila. Inrupir ni Cojuangco ti maikadua a pagpilian. Pinangtaan da dagiti mannalon a “magerret ti tengnged da no saan da nga umannugot.”



Iti manipesto nga impablaak dagiti mannalon, impaduyakyak da:

“Nagbiag ken nagubra kami iti narigat la unay a kasasaad nga intinnag ti TABACALERA. Ngem ni kaanoman, saan mi a ninamnama a maaguman kami iti daga, makissayan ti sukayen mi, mapatakyas iti pagindegan, wenno mapabakwit iti saba” a lugar. Daytoy ti kaipapanan ti transaksyon ni Danding Cojuangco.”

Saan nga impalubos dagiti mannalon ti Hacienda San Antonio-Santa Isabel nga agumen latta ni Danding ti daga da. Saan da a nagsarimadeng iti pannakidangadang.

Iti uneg ti tallo a tawen (1980 - 1983), inrussuat da ti kadakkelan a tignayan ti masa laban iti panagagum. Adu kadakuada ti rinanggasan dagiti Company Guards ken 21st IB ti Philippine Constabulary. Nasurok-kumurang tallo pulo a biag ti nagbuis.

Iti kamaudianan, immatras ni Danding ken Gobernador Faustino Dy, Sr. gapu iti natibker a panagkaykaysa ken panaglaban ti umili.

Iti agdama a panawen, iti panagsubli ni Danding, nakasagana latta ti umili a sangoen ti panagsubli manen ti sigud a kabusor da.

Saan pay nalpas ti pannakidangadang. **B**

Saan nga impalubos dagiti mannalon ti Hacienda San Antonio-Santa Isabel nga agumen latta ni Danding ti daga da. Saan da a nagsarimadeng iti pannakidangadang

PANNAKADUSA NI JESUS SEBASTIAN NAGRAGSAK TI UMILI

Napnuan-ragsak ken dakkel ti panagyaman dagiti umili kadagiti Nalabaga a Mannakigubat a nangipatungpal iti desisyon ti Rebolusyonaryo a Pangukuman ti Umili



Naipagballigi ti Benito Tesorio Command -NPA ti ispesyal nga operasyon a nangdusa kenni Mayor Jesus Sebastian idi Abril 22, 2002 iti mismo a munisipyo ti Jones.

Naklining dagiti Nalabaga a Mannakigubat ti dua nga M16, 1 nga M203 grenade launcher ken maysa a .45 caliber pistol ken bala manipud kadagiti pulis ken militar a badigard ni Sebastian. Kasta met ti 9mm pistol na.

Insaklang ti umili ti Jones ken dagiti rebolusyonaryo a puersa ni Sebastian iti Rebolusyonaryo a Pangukuman ti Umili iti babaen ti Demokratiko a Gubyerno ti Umili.

Napaneknekan a nagbasol isuna iti aktibo a pannakikumplot iti kampanya a kontra-rebolusyonaryo ti AFP ken Gobyerno ti Pilipinas laban iti Partido, NPA ken umili a Pilipino.



Panangitandudo iti CAFGU

Katulong ti AFP ni Mayor Jesus Sebastian iti panagitakder ti CAFGU iti napalabas a tawtawen. Itay napan a tawen, nangibuangay manen ti CAFGU iti ili ti Jones. Pinasango, pinilit ken binutbuteng na, kadua na dagiti opisiales ti 502 Bde, dagiti kapitan kadagiti barangay tapno bumotos pabor iti panangbiag manen iti CAFGU.

Dagitoy a CAFGU ti mangririribuk ita kadagiti baryo ti Jones. Dadaulo dagitoy iti panagtakaw, panagriribuk iti talna ti baryo ken dadduma pay a dakes nga aramid.

Panangsuporta kadagiti Nararanggas nga Operasyon Militar

Nagtultuloy a sinuportaran na dagiti panangraut ti 502nd Bde iti biag, karbengan ken kabiagan ti umili. Inlupit-lupit na dagiti

biktima ti ranggas-militar.

Iti operasyon militar idi 1998 kadagiti baryo ti Jones, inrasonanna ti panangpuor dagiti tropa ti 21st IB kadagiti balbalay ti mannalon iti Villabello, Jones. Saan kano a rumbeng nga agreklamo dagiti masa, gapu ta kalapaw laeng met dagiti napuoran a balbalay da.

Iti maysa a labanan iti baet ti NPA ken tropa ti 45 IB PA idi 1999 iti Dicamay Dos, Jones, nirasunan na ti pannakasugat ti maysa nga ubing ken baket. Basol da kano a nairaman da gapu ta agpaspasangbay da ti NPA kadagiti balay da.

Kakumplot ni Sebastian dagiti tropa ti 45 IB nga agop-operasyon manipud Oktubre 2001 agingga ita kadagiti baryo ti Villabello, Dicamay Uno, Dicamay Dos, Linomot, Santa Isabel ken Namnama iti Jones. Ken kadagiti kabangibang a baryo iti Echague ken San Guillermo.

Kadaytoy nga operasyon militar, direkta a kanaig ti 45 IB

iti 27 a kaso ti panaglabsing iti karbengan tao. Karaman ditoy ti panagtortur, puersado a panagpagayd, panagtakaw, pananggundaway iti babbai ken dadduma pay.

Ahente iti Saywar

Aktibo ni Sebastian iti kampanya ti saywar ken Civilian-Military Operations (CMO) ti AFP. Dagitoy nga operasyon ket paset ti kontra-rebolusyonaryo ken kontra-umili nga operasyon ti AFP a kakuyog ti kombatan ken paniktik.

Iti CIVAC idi 2000, kakuyog ni Sebastian ni Col. Josefino Manayao iti brigada nga operasyon a simmaklaw kadagiti ili ti Jones, Echague ken San Guillermo. Ditoy nga operasyon a nadusa ni Col. Manayao iti ambus ti NPA.

Aktibo ni Sebastian iti propaganda a kontra-komunista ken kontra-NPA. Kalpasan ti panagusig ken panagdesisyon ti kaso ti sibilyan nga impormer a barangay kapitan ti Villabello a ni Sabas Adzuara, linais na ti Rebolusyonaryo a Pangukuman ti Umili a 'bogus a korte' kano daytoy.

Impasaknap na ti pammadakes a ti NPA kano ket agrekrekruta kadagiti menor de edad. Inwaragawag na ti kinaulbod a kinolektaan isuna ti Demokratiko a Gobyerno ti Umili ti Permit-to-Campaign Tax idi napalabas nga eleksyon. Saan a nakitungtong ti rebolusyonaryo a tignayan kenkuana ta isu ket target ti law enforcement action ti NPA. Nakakampanya laeng kadagiti

larangang gerilya ta kakuyog na ti nasurok maysa a platun nga armado a tropa ti AFP-PNP.

Panangipatakder ti Kampong Militar

Direkta a timmulong ni Sebastian iti panangipatakder ti kampong militar iti Dibuluan, Jones. Mandar na ti puersado a panagtrabaho ken panagkota dagiti bumaryo ti Jones iti materyales a mausar iti kampong. Kampong daytoy ti 45 IB PA.

Nagiwaras isuna ti polyeto a 'BHB-BTF Agam-amangaw' a naglaon ti panangikalintegangan iti panagpakampong ken panangtagibassit iti panagtignay ti umili ti Jones laban kadaytoy.

Kriminal ken Sibil a Kaso

Malaksid kadagiti kontra-rebolusyonaryo a krimen nga adda kabatog na a pannusa a patay, adu pay ti kriminal ken sibil a nagbasulan ni Sebastian.

Kakumplot iti naduma-duma a kaso ti korupsiyon ken anomalya. Presyuan na ti dakkel dagiti proyekto iti munisipyo tapno makapagkurakot. Kas iti baro a naitakder a munisipyo ti Jones a prinesyoan na ti 90 milyon a pesos.

Impuesto na pay dagiti katalek ken gagayem na kadagiti dadakkel a proyekto. Mangala isuna ti 20% manipud iti badyet dagiti proyekto ti ili.

Agum ti Daga

Kakuyog ni Sebastian dagiti ganggannaet a korporasyon iti panagagaw iti daga dagiti nakurapay a mannalon, nailian a minorya ken settler. Ken pannakapadisi dagiti mannalon kadagiti daga a sinukay ken pinadur-as da. Kaunget la unay ti mannalon ti kastoy nga ar-aramiden na.

Nupay iliblibak na, sinuportaran na ti plano a panagminas ti Royal Cement and Mining Corporation kadagiti baryo ti Dicamay Uno, Dicamay Dos, Minuri ken Bannawag iti Jones. Ken dadduma pay a baryo iti kabangibang nga ili.

Kakumplot ni Sebastian ti imperyalista a Nestle Corporation iti panagagaw iti 1,000 nga ektarya manipud kadagiti umili ti Dicamay Uno, Dicamay Dos, Sta. Isabel ken Namnama.

Nakitulag ni Sebastian iti DENR tapno maipauneg ti 914 ektarya a timberland iti Reforestation Project ti reaksyunaryo a gobyerno. Agpamula koma ti g-melina, narra ken dadduma pay. Maagawan ti suksukayen a daga dagiti bumaryo ti Villabello, Dicamay Uno, Dicamay Dos, Sto. Domingo ken dadduma pay a barbaryo.

Iti pannakadusa ni Mayor Sebastian, naikkan-hustisya dagiti umili ti Jones. Nakita da met ti kabaellan ti Nalabaga a Hukbo da a pagbayaden dagiti addaan krimen iti umili. **B**





Iti reyd iti munisipyo ti Jones

NADUSAN NI MAYOR JESUS SEBASTIAN

Sebastian: kontra-

rebolusyonaryo a kriminal

Nasorpresa dagiti reaksiyunaryo a tropa ti AFP ken dagiti among da iti Isabela. Iti apagkanito, immatake ken nakaatras iti munisipyo dagiti Nalabaga a Mannakigubat. Ket nadusan ni Mayor Jesus Sebastian. Kasano a naipagballigi daytoy dagiti gerilya?

Naanus ken naurnos a panagsagana

Ti operasyon ket naannad ken detalyado a naip plano. Adu ti inkonsidera.

Guwardyado ni Mayor Sebastian. Saan a bumaba iti 5 ti badigard na a pulis ken soldado. Madama pay idi ti operasyon militar ti 502 Bde iti Jones ken Echague. Asideg iti munisipyo dagiti kampo ken detatsment ti kabusor. Kaabay na ti kampo iti Balabal.

Binukel ti maysa nga iskward a yunit ti NPA. Dagus da a nagtignay. Naisagana dagiti rekisito ti operasyon. Inkahon ti target sadino man ti papanan na. Napadron ti garaw ti target. Karaman dagiti badigard.

Naala dagiti napapateg nga impormasyon. Nirekurida ti paniktik ti yunit ti munisipyo, balay ti mayor, istasyon ti pulis ken daldalan.

Naimapa ti balay na ken munisipyo. Ti poblacion ken dagiti kaarruba a baryo.

Inkeddeng, pinasiar ken inadal a nalaing dagiti gerilya dagiti posible a lugar a pagbiraan iti target.

Nagirussuat ti rehearsal ti yunit. Agingga a nasanay da ti annatup nga estilo ken garaw.

Nakasaganaan ti nakasurat a paduyakyak. Nakumpleto ti pangdisgays. Naisagana met dagiti agas ken dadduma a kasapulan.

Iti aldaw ti panagbira, nasapa nga rinekurida ti tim ti paniktik ti lugar. Pagserkan iti panagraut. Ken pagruaran. Naammuan ti puesto dagiti badigard a pulis ken soldado. Ken dadduma pay nga armado a tropa ti reaksiyunaryo a gobyerno. Maudi a panag-G2 daytoy sakbay nga immasideg iti target ti yunit a bumira.

Napartak a reyd

Sakbay ti alas-9 ti bigat, nakaasidegen dagiti nakalugan a gerilya iti munisipyo ti Jones. Kalleppas ti flag ceremony. Adda idiyay ti target. Kaddua na dagiti badigard, a tallo laeng idi.

Iti alas 9:00 ti bigat, pimmanaw ti back-up a lugan ni mayor. Adun ti lugan ken agkarapagna dagiti tao iti compound ti munisipyo.

Imparada ti lugan ti kakadua iti abay ti lugan ni Mayor Sebastian. Gagangay ti panaggaraw da. Ipagarup latta ti tattao a tropa ti AFP ti bimmaba iti lugan.

Umuna a dimsaag ti tim ti asolt. Simmaruno ti mainbody. Naudi ti look-out. Saan a nakadlaw dagiti badigard, uray kasangsango dan ti kakadua iti munisipyo. Nakapokus ti atensyon da iti sabali.

Nagpukkaw dagiti operatiba ti “DAPA! DAPA!” Nasorpresa dagiti badigard. Saan da a nakagaraw.

Bayat a nakapakleb dagiti badigard, napartak a nagklining ti paltog dagiti kakadua.

Iti lobby ti munisipyo, napartak a simrek dagiti gerilya. Adda iti lobby ni Sebastian. Nagsaludsod pay no ania ti ranta da. “Apay, sir?”, maudi a saludsod na.

Kasla kimat a naipatungpal ti pannusa kenni Sebastian. Naklining pay ti kakadua ti iggem na a 9mm pistol.

Awan pay dua a minuto, nalpasen ti misyon. Immatrasen dagiti gerilya a nakalugan met laeng iti van. Awan pueras ti kabusor a nakaitured a nangbangan iti kakadua.

Nabalitukan nga adal

Naan-anay ti nagun-od a balligi. Nabira ti kangrunaan a target. Naklining ti armas na ken dagiti iggem ti badigard na. Maysa nga M203 ken pito a bala, 2 nga M16 ken 175 a bala, 9 a magasin, 1.45 cal. karaman ti 2 a magasin ken dagiti bala na, 1 9mm, 2 magasin ken 25 bala, 1 a cellphone ken sumagmamano a papeles.

Awan ti kaswalti dagiti operatiba, nakaatras da amin. Naibrodka a dagus ti paduyakyak mainaig ditoy.

Ania dagiti kangrunaan a makagapu iti balligi?

Tulbek iti balligi ti natibker a pangngeddeng dagiti kadre ken kameng ti Partido, opisyal ken mannakigubat ti NPA nga immakem kadaytoy a misyon. Determinado da nga ipatungpal ti pannusa. Uray adu a rigat, peggad ken parikut ti linasat da. Awit da ti rebolusyonaryo a tured ken kumpyansa. Pampanunoten da ti masa a mangnamnama a maikakat ti nabayagen a siit iti karabukob da a ni Sebastian.

Impakat da ti panagplano, inisyatiba, indibidwal a responsibilidad ken timwork. Nairut ti panagkaykaysa ken panagannatop ti tunggal maysa.

Nairut a pinagiggeman da ti disiplina ti BHB ken dagiti naikeddeng a patakaran ditoy. Kas iti panangsigurado nga awan madangran a masa ken madadael a sanikua da. Saan met a nadangran dagiti badigard ni Sebastian agsipud ta saan da karaman iti kaso iti Hukumang Bayan.

Naipakat ken epektibo a nagtignay ti lambat paniktik. Naitakder ti lambat-paniktik manipud sona a gerilya agingga iti

Tulbek iti balligi ti natibker a pangngeddeng dagiti kadre ken kameng ti Partido, opisyal ken mannakigubat ti NPA nga immakem a misyon. Determinado da nga ipatungpal ti pannusa. Uray adu a rigat, peggad ken parikut ti linasat da. Awit da ti rebolusyonaryo a tured ken kumpyansa. Pampanunoten da ti masa a mangnamnama a maikakat ti nabayagen a siit iti karabukob da a ni Sebastian.

sentro ti ili. Manipud iti base a masa agingga kadagiti akintengnga a puerisa.

Nakalap ti naan-anay nga impormasyon ket nasigurado ti balligi.

Tagibassiten dagiti kakumplot ni Sebastian iti reaksyunaryo a pulitika ti reyde. Saan kano nga NPA ti nangirussuat kadaytoy. No di dagiti kalaban ni Sebastian iti pulitika. Kayat da a pagparangen a simple a kaso ti rinnisiris iti bulok a pulitika ti gapu ti pannakatay ni Sebastian. Kayat da met a kaluban iti imatang ti umili ti panagdur-as ti gerilya a pannakidangadang iti rehiyon.

Naan-anay a naikahon ti target. Ditoy a naiyannatop ti plano. Naliklikan ti aniaman a peggad dagiti gerilya ken masa.

Suporta ken aktibo a panagtignay ti masa ti basaran ti balligi. Iti tunggal tukad ti panagsagana, aktibo da a timmulong. Nagited kadagiti impormasyon iti tignay ti target ken operasyon ti kabusor. Inlimed da nga imbase ken inyakar-akar dagiti gerilya tapno di makadlaw ti kabusor. Nagisagana iti makan ken dadduma pay a suporta a lohistikal.

Atiddog ti listaan dagiti basol ken panagabuson ni Mayor Sebastian kontra iti umili. Isu a naragsak ken nakasagana ti masa a timmulong tapno madusa isuna.

Iti kabuklan, determinado a panangsango iti misyon ti tulbek iti panagballigi iti ispesyal nga operasyon a nangdusa kenni Sebastian. Mairaman ti naannad ken panagsanay dagiti operatiba kadagiti taktika ken pamuspusan. Basaran ti balligi ti napateg a tulong ti nalawa a masa a nabayagen nga ikuskuspil ken

gunggundawayan da Sebastian ken dagiti kakumplotna. Mabigbig met ti suporta ditoy dagiti akintengnga a puerisa iti ili ken syudad.

Panangtagibassit dagiti reaksyunaryo

Nadusan ni Sebastian kadagiti krimen na iti umili ken iti rebolusyon. Ngem agtultuloy dagiti sigud a kakumplot na iti reaksyunaryo a pulitika a mulitan ti NPA, umili ken rebolusyonaryo a hustisya. Bayat a makibinnalubalda kadagiti pulitiko a kontra kadakuada.

Isu nga isaksaknap da a nabayadan a killer dagiti kalaban ni Sebastian dagiti nangpatay kenkuana. Kayat da a pagparangen a “mabaybayadan a killer” dagiti Nalabaga a gerilya. Dagiti ngamin among da a pamilya Dy ket agus-usar kadagiti “hired killers” a mangsalsalbeyds kadagiti kalaban na iti reaksyunaryo a pulitika iti Isabela.

Tagibassiten dagiti kakumplot ni Sebastian iti reaksyunaryo a pulitika ti reyde. Saan kano nga NPA ti nangirussuat kadaytoy. No di dagiti kalaban ni Sebastian iti pulitika.

Kayat da a pagparangen a simple a kaso ti rinnisiris iti bulok a pulitika ti gapu ti pannakatay ni Sebastian. Kayat da met a kallubnan iti imatang ti umili ti panagdur-as ti gerilya a pannakidangadang iti rehiyon.

Nupay kasta, mabalin a makitinnulong ti BHB uray kadagiti pulitiko nga adda bukod na nga interes tapno dusaen dagiti napeklan a berdugo ken kriminal a nadisisyonan ti Hukumang Bayan, lalo dagiti kalaban iti reaksyunaryo a pulitika, a kas kenni Gobernador Dy iti Isabela. **B**

TI AFP KEN DINASTIYA A DY TI PUDNO A TERORISTA TI ISABELA

Maysa a nainkalintegang nga aksyon militar ti reyd ti NPA iti Jones idi April 22. Saan a terorista nga aksyon kas ti kayat a panangiladawan ti AFP ken ni Gobernador Dy.

Terrorismo ti uso ken naruar a maibalbalikas iti agdama. Saan laeng dagiti makaawat no di uray dagiti ignorante iti kaipapanan daytoy. Saan laeng a dagiti sumupsuppiat ditoy, uray dagiti promotor wenno agpampammarang a laban kadaytoy.

Iti nabiit laeng, nakikorus da Gov. Faustino Dy Jr, Cong. Faustino Dy III ken Brig. Gen. Rodolfo Alvarado kadagiti dadduma pay nga agpampammarang a kampeon ti kontra-terrorismo.

Inawagan da a terorismo ti panangipatungpal ti NPA iti pannusa a patay kenni Mayor Jesus Sebastian iti Jones, Isabela segun iti desisyon ken mandar ti Hukumang Bayan iti babaen ti Rebolusyonaryo a Gubyrno ti Umili. Ngem gapu ta isuda't kangrunaan a mangitantandudo ti terorismo, balballikogen da ti pudno a kaipapanan daytoy.

Terorismo ti awanan lapped a panangipakat ti ranggas ken pananglipit kadagiti umili a saan a kombatant ken saan a direkta a karaman iti maysa a gyera. Kasta met iti nakaro a panaglabsing kadagiti establisado nga internasyunal a linteg ken pagannurutan iti gyera. Basar ditoy, awan uray aniaman a mantsa ti kastoy a pakaipapanan ti panangawag ti pamilya Dy ken opisyal ti AFP a terorista kano dagiti CPP-NPA-NDF.

Ania't kinapudno iti reyd ti NPA iti munisipyo ti Jones idi Abril 22?

Awan nairaman uray maysa a sibilyan iti panangdusa kenni Sebastian iti uneg ti

munisipyo, uray adu't tao kadayta a kanito.

Saan a nadangran dagiti badigard na a pulis. Napartak da a simmuko ken nangisuko kadagiti paltog da kadagiti Nalabaga a Gerilya.

Ti nadusa a mayor ket napeklan a kontra-rebolusyonaryo.

Kakumplot ti AFP iti kampanya a "kontra-insurhensya" daytoy laban iti tignayan a rebolusyonaryo. Ken notoryoso a butangero. Iti kinapudno na, nakaparabaw ti 9mm pistol iti lamisaan na bayat nga agop-opisina idi kanito a nadusa.

Pammaneknek dagitoy iti istrikto a panangsurot ti NPA iti internasyunal a linteg iti gyera ken panagbigbig kadagiti karbengan a kas tao. Ti inrussuat ti NPA ket panangipatungpal ti rebolusyonaryo a hustisya. Saan a terorismo.

Ti AFP ti pudno a terorista. Daytoy ti kangrunaan nga instrumento ti estado dagiti dasig a mananggundaway tapno lipiten ken iturayan ti umili.

Sakbay pay ti reyd iti Abril 22, kaguddua a tawenen nga agop-operasyon dagiti tropa ti 502nd Brigade kadagiti nasulineken a baryo ti Echague ken Jones. Manipud Oktubre-Disyembre 2001, nasurok 15 platoon ti



Gobernador Dy: ti pudno a terorista



AFP KEN CAFGU: instrumento ti terorismo ti estado

nagoperasyon iti 28 a baryo ditoy. Ken kadaytoy a tawen, nagumok ken nagipasaknap da ti kinadakes kadagiti baryo ti Narra, Diasan, Caniguing ken Nilumiso

iti Echague, ken Villa Bello ken Namnama iti Jones.

Iti Fact-Finding Mission (FFM) iti Jones nga inisponsoran dagiti mannalon ti Villa Bello, tao ti simbaan ken dadduma pay a personahe idi Nobyembre 2001, ken ti FFM iti Echague kadaytoy Marso, naibulgar ti atiddog a listaan ti panaglabsing ti 45th IB PA kadagiti karbengan tao.

Kararanggasan kadakuada ni 1Lt. Angelbert Gay, commanding officer ti "C" Company ti 45th IB PA, a nakakampo iti Barangay Dibuluan, Jones.

Kimmaro ti militarisasyon iti panagdukot ken panagsalbeyds ti lima a militar kenni Warlito Nagasao, coordinator ti Bayan Muna iti Barangay Villa Campo, Echague idi Marso. Napasamak daytoy bayat a nakakampo ken agop-operasyon ti 45th IB PA iti kabangibang a baryo ti Narra, Diasan ken Caniguing.

Dimmanon iti baro a kangitingitan ti militarisasyon iti Abagatan nga Isabela manipud maudi a lawas ti Abril. Baro manen nga atiddog a listaan ti kinaranggas iti umili iti Forest Region ti nainayon.

Naireport dagiti kaso ti panagranggas, panagipangta, panagpilit ken dadduma pay a trabaho a terorista ti 45 IB PA. Agtultuloy ti puersado a panagitakder ti CAFGU ken CVO iti laksid ti panagsuppiat ti umili ditoy.

Napeklan ti 45 IB PA iti panaglabsing iti

internasyunal a makatao a linteg. Idi Setyembre 1999, iti Dicamay 2, Jones, ni Lydia "Ka Ren" Sicat ket pinaltogan da iti ulo na bayat a nakaidda, agsaksakit ken awan paltog na, maysa nga *hors de combat* (baliksen kas *or de komba*) wenno awan kabaelan a lumaban.

Iti labanan ti NPA ken AFP iti Dolores, Quirino, idi Pebrero 12, tinatek ti bagsol dagiti tropa ti 45th IB ti tallo a natiliw a Nalabaga a Mannakigubat. Uray awan armas ken nakangato ti ima da. Rinames da ti bangkay ni Janet "Ka Angel" Taguba. Kalpasanna, linaplap da ti suso na.

Ti kumarkaro a terorismo militar ket nakabasar iti konsepto a "Back to Basics," maysa a paset ti Campaign Plan Balangai ti AFP. Taltalmegan daytoy ti panagpakalaing ti militar iti panagpatay kadagiti kalaban a hukbo ken iti panagisaknap ti buteng ken ranggas iti base a masa.

Nagkupasen ti konsepto a "*winning the people's hearts and minds*", a mangtaltalmeg kadagiti operasyon a sibil-militar (psychological warfare ken panangirussuat ti sumagmamano a civic actions) kas katinnulong ti nararanggas nga operasyon a pangkombat.

Todo a suporta iti kampanya ti panagpangpangas ti AFP ti it-ited ti warlord a dinastiya Dy. Dagiti terorista a tropa ti kangrunaan a katinnulong na iti panangipatungpal kadagiti proyekto na a manangagum-ti-daga ken mananggundaway iti masa a mannalon.

Ti dara ti umili a nagmantsa iti kanigid nga ima ti AFP ket nagmantsa met iti kanawan nga ima ti dinastiya. Nakapagtalinaed ken nawaya dagiti Dy iti pulitika gapu ta nakasanggir da iti panagranggas, panaglipit ken panagidadanes iti umili ken kadagiti karibal da iti reaksyunaryo a pulitika iti probinsya.

Ti numero uno a klase ti terorismo iti pagilian ket ti terorismo ti estado nga ibagbagi ita ti Rehimen US-Arroyo ken itantandudo ti AFP ken dagiti burukrata a kapada ni Dy. Mapunas laeng daytoy babaen iti rebolusyonaryo a tignayan a lalaokan ti nalawa nga umili. **B**

Ti rebolusyon ket para kadagiti agtutubo

Ti pakasaritaan ni Ka Jonas, kameng ti Batang Huwaran ken parttaym iti BHB



*'Ti lubong ket para kadakayo
kasta met a para kadakami.
Ngem iti maudi a panagamiris,
daytoy ket para kadakayo'*
Mao Tse Tung

Awagan dak kas Ka Jonas. Mano a tawen laengen, agbalinakon a naan-anay a kameng ti BHB, ti naindaklan a hukbo. Ur-urayek daydiay a panawen a napnuan-ragsak ken determinasyon. Daytoy ti pakasaritaak.

Manipud nagnakemak, kanayon kon a makadenna dagiti kakadua. Sigud a nagnaed ti pamilyak iti Isabela. Sadiay a simmampa idi ni tatang ko iti NPA ken nagtignay ni inang ko kas aktibista a masa. Adu pay a kabagyan mi ti nagtignay ken nagbuis.

Gapu iti kinakurapay, namin-ano a daras met nga immakar

kami iti ili. Uray sadinno ti papanan mi, adda latta kakadua. Nagduduma laeng ti rupa, nagan ken timek da-ngem para kaniak, sangsangkamaysa da a nagbalin a taklin ken sanggir ko.

Ingkaubingan ti rigat

Rigat, ranggas ken adu a tuok ti dimmakelak a kasasaad. Nalaus idi ti panagin-inom ni tatang iti arak ket madissoannak sagpaminsan.

No dangrannak idi ni tatang, nasakit ti nakem ko. Impangtak iti panunot ko nga agibalesak nu dumteng ti panawen. Idi dumakdakkalak

ken napamulatanak, naamiris ko a ti panagrigrigat mi ti mangidurduron kenkuana iti nakaro a panagbartek.

Saan kami a nakapag-eskwela nga agkakabsat. Awan pulos nakaturpos uray no elementarya. Gapu iti rigat ti biag. Nabangonak ken nagdakkalak nga

agkalkallautang ti pamilyak tapno agbirok ti pagbiag. Ken iduron ti likliklikan mi a kinaranggas ti kabusor.

Manipud naaddaanak ti nakem, kanayon a pagpupudotan ti militar ti nagannak ko. Naregget da ngamin iti panagtignay. Saan a makaliklik. Uray sadinno kami nga agnaed, adda kinarigat. Isu nga adda latta met dagiti kakadua. Iti kastoy a dimmakelak ken napanday kas rebolusyonaryo.

Dimmakel iti Rebolusyon

Nasingpet ken naanus ti kakadua kaniak ken iti amin a makitak a makalangen da. Napalag-an da ti dagsen ko iti biag. Di naggessat ti panangipateg, panangdungngo da kaniak. Dagiti negatibo ket pinagbalin da a positibo. Dagiti nasipnget ket pinagbalin da a nalawag. Agingga ita, isuda ti sinamar ken giya ti biag ko.

Pinanday dak iti rebolusyonaryo a panagtignay iti uneg ti baryo. Idi 1999, nagbalinak nga organisador ti



ubbing. Nabukel mi ti grupo ti ubbing.

Malagip ko idi damo a panagorganisak. No saan ko a maallukoy dagiti padak nga ubbing iti grupo, danugek ken saktak ida. Dagus a dinillaw ken pinalawagandak dagiti kakadua.

Intugot dak iti mano nga aldaw tapno dillawen ken adalan ti Rebolusyonaryo nga Aktitud. "Anos ti masapul no agpalawag ken agorganisa iti masa, uray dagiti maud-udi ken saan pay a makaawat," kuna da. In-inut ko a nailinteg dagiti madi nga ugalik. In-inut ko met a napadakkal ti grupo mi nga ubbing.

Inarakup ko ti panggep ti rebolusyon kas ubing ken kas mannalon. Gapu ta nalawag kaniak ti panggep ti ilablaban ti Partido ken kakadua nga NPA, naregget ko nga impatungpal dagiti rebolusyonaryo a rebbengen iti baryo.

Napartak ko nga ipasa iti kakadua ti tignay ti kabusor iti baryo. Ti ammo dagiti kabusor, agay-ayamak no agtartarayak. Ngem agturongakon iti ayan ti kakadua. Tapno makaaddang da iti kaadda ti militar iti baryo. Siak met ti agurnong kadagiti tulong ti masa iti baryo mi, tapno adda makan ken mausar ti kakadua.

Napadasak met ti nagiwarais kadagiti polyeto, Baringkuas ken dadduma pay a babasaen. Ken nagpigket



kadagiti poster ti rebolusyon. Karaman ti panagpintura kadagiti islogan ti tignayan tayo.

Ay, nagmayat gayam! Siguro, ti pagarup dagiti soldado, simple laeng nga ubing ti nakita da nga agpagna-pagna iti sentro ti ili. Sigurado a nakigtot da iti insurat mi iti nalabaga a pintura: 'Agbiag ti New People's Army!'

Panagsampa iti BHB

Ita, kinse ti tawen kon. Agtigtignayak kas parttaym. Saanak pay mabalin a sumurot iti labanan. Saan pay ipalubos ti patakaran ti kakadua ta ubingak pay. Tumultulongak iti panagmentina ti kabiagan no agkampo ken agkonsolida dagiti kakadua.

Iti nabiit a panawen, nagakemak met kas mangtarawidwid iti pagbiag ti

yunit ken agpataray iti komunikasyon iti baet dagiti yunit.

Umun-uneg ti kaammuak iti tignayan. Maawatak metten a ti bulok a gimong ti makagapu iti panagbarbartek ni tatang. Pagig-iggemak ti nakuna ti MD* basar ti prinsipyo

ni Marx: 'agbaliw ti gimong, karaman ti tao.'

Pumigpigsa ti gagar ko nga agbalin a pultaym ti NPA. Kayat ko nga agnanayon a kakuyog dagiti kakadua a nabayag kon a sanggir ken giya. Ngem agurayak pay agingga maragpat ko ti umno nga edad. Gapu ta

masapol pay nga agtignayak kas non-combatant, segun iti nasapa nga edad ko.

Kayat ko nga ituloy ti napanawan ni tatang ken angkel ko a simmampa idi iti Hukbo. Kayat ko ti lumaok iti panangdamili iti nalawag a masakbayan mi nga ubbing. Iti panangibuangay

Kayat ko nga ituloy ti napanawan ni tatang ken angkel ko a simmampa idi iti Hukbo. Kayat ko ti lumaok iti panangdamili iti nalawag a masakbayan mi nga ubbing. Iti panangibuangay ti baro a gimong nga awanan-pananggundaway ken panagrigrigat.

.....

ti baro a gimong nga awanan-pananggundaway ken panagrigrigat.

Sika, pada nga agtutubo, kaano ka a kumuyog kadagiti kakadua? **B**

*MD- *materyalismo a diyalektiko*

PAGWADAN NGA UBBING

Iti Venerando Villacillo Front , dumurdur-as ti panagorganisa kadagiti rebolusyonaryo nga ubbing

Iti uneg ti bandera ti rebolusyonaryo a tignayan, umad-adu ti bilang dagiti ubbing a mapalpalawagan ken maor-organisa tapno agtignay para iti nailian-demokratiko nga interes ti umili.

Kadagiti tawen ti 1991-1994, sumagmamano a baryo ti natakderan ti grupo nga inawagan dagiti kakadua kas 'Batang Huwaran' (Pagwadan nga Ubbing).

Umak-akem dagiti Pagwadan nga Ubbing ti napapateg a papel iti panangidur-as ti rebolusyonaryo a trabaho. Lumalaok da iti panagorganisa ken panangadal kadagiti pada da nga ubbing. Kumuykuyog da kadagiti tignay-protesta agingga kadagiti sentro nga ili.

Kasta met nga umak-akem da ti trabaho a paniktik. Panaggiya iti yunit. Panangiballasiw kadakuada kadagiti waig ken karayan. Ken dadduma pay a trabaho iti rebolusyon.

Nabunga ti trabaho iti intar ti Pagwadan nga Ubbing. Adu kadakuada ti simmampa iti Hukbo kalpasan ti sumagmamano a tawen.



Panagregta manen

Saan a naikkan ti naan-anay a talmeg ti panagorganisa kadagiti ubbing iti VVF manipud iti tawen ti 1994-1998. Nadumaduma a makagapu. Idi 1999, inkeddeng ti Komite ti Partido a paregtaen manen ti panagorganisa iti intar da.

Inawis da iti rebolusyonaryo a dalan dagiti ubbing kas nayon a pwera. Mapanday ken mamulat iti makadasig a prinsipyo iti nasapa nga edad. Ken agserbi kas saan a maatianan nga ubbog ti mannakigubat ti NPA.

Iti gimong a Pilipino, dakkel a bilang ti ubbing ti biktima ti pananggundaway. Agrabaho kadagiti talon iti away ken pabrika iti syudad ken ili. Adu ti saan a makapagiskwela. Isu a nasapa a marikrikna dagiti ubbing iti malakolonyal ken malapyudal a gimong ti kinaumno ti rebolusyonaryo a panaglaban.

Kas resulta, umad-adu dagiti ubbing nga aktibista. Naisangsangayan ti kinaregta da iti trabaho a pangkultura. Ken ti panangidur-as ti rebolusyonaryo a tignayan iti pangkabuklan. **B**



Naballigian a Kampanya nga Agreb iti Cagayan

2,500 pamilya iti 14 a baryo ti dagus a nagbenepisyo manipud iti panagtignay dagiti mannalon laban kadagiti apo't daga ken usurero iti Daya a Cagayan

Iti naangay a kumprontasyon iti barangay hall ti Centro Baggao idi Abril 8, naballigian a nairupir dagiti mannalon a maibaba ti porsyento ti pautang. Ken maikkat amin ti langa ti pananggundaway iti panangilako kadagiti produkto da.

Dinar-ayan daytoy ti nasurok 600 a mannalon, dagiti opisiales ti ili ken dagiti barangay, ken tao ti simbaan.

Kontra-Usura

Manipud iti dati nga interes nga 50-60 kilo ti mais ken irik iti tunggal 1,000 piso nga utang, naibaba ti interes iti 25 kilo. Maipatungpal ti naan-anay a pannakaibaba na iti sumaruno a tawen (2002). Kadaytoy nga apitan, makissayanen ti 10 kilo ti interes ti pautang.

Kagiddanna, nagun-od dagiti mannalon dagiti dadduma pay a balligi kas ti sumaganad:

■Saan dan nga obligado nga aglako ti produkto iti nagutangan da. Mabalin dan ti aglako iti sabali a treyder a nangatangto ti panagpresyo na.

■Maisardeng ti pananguon ti interes iti abono no utangen dagiti mannalon. Maipautang ti abono basar iti presyo iti merkado.

■Saanen nga agbayad ti interes ti utang iti panawen ti kalamidad.

■Maisardeng ti panagtiliw kadagiti saan a makabayad ti utang ken ti panangkumpiska ti nuang ken daga.

■Agbalin a regular ti inspeksyon kadagiti pagkiloan dagiti treyder kas addang laban iti panagsuitik.

■Bantayan met ti presyo ti mais ken irik iti bagsakan a merkado. Ditoy a maibasar ti panagpresyo ti produkto kadagiti mannalon.

Panangisardeng ti abang iti daga

Nasurok-kumurang 100 pamilya iti dua a baryo iti Daya a Cagayan ti nagbenepisyo iti

panangisardeng ti panagabang iti daga. Maiyab-abante itan ti kampanya a tagikuaen a libre ti daga a suksukayen a nabayagen nga ab-abangan da.

Kagiddan daytoy ti panangitandudo ti panagtinnulong dagiti mannalon tapno mapadur-as ti produksyon ken salun-at.



Adu ti naapit a naimbalitukan nga adal para iti panangpapigsa ti panagkaykaysa ken panangidur-as ti interes ti umili.

Malaksid iti pang-ekonomiya a benepisyo, nagserbi ti

kampanya a masa iti panagpalawa ken konsolidasyon dagiti organisasyon masa. Adu met ti napatignay nga akintengnga a puersa.

Iti dadduma a paset ti Daya a Cagayan, agtultuloy ti pannakidangadang dagiti mannalon a tagikuaen ti daga a suksukayen da, maibaba ti abang iti padanum ken maingat ti presyo ti saba. **B**

“AFP KEN CAFGU, Riribuk iti Umili, Labanan!”- *Ka Crispin*



Iti kumarkaro a panagranggas ken panagriribuk ti AFP iti Laud a Cagayan, nagpanawagan iti umili ni Ka Crispin Apolinario, tagapagsarita ti CPP-NPA Danilo Ben Front, nga ibulgar ti kinadangkok dagiti tropa ti AFP ken suppiaten ti agtultuloy a panagrekluta da ti CAFGU

“Nakaul-ulimek idi ti baryo mi. Ngem idi naitakder ti CAFGU, riribuk ti napasamaken. Mapukpukaw dagiti kaikaisuna a taraken mi. Imbes a namnamaen mi a pangsilpo iti anges mi. Ngem takawen da met lattan a pangpulutan.” Reklamo dagiti tattao kadagiti barbaryo a natakderan ti CAFGU.

Nabiit pay a naitakder, nagadun ti reklamo dagiti tattao kanaig iti agkakadakes nga aramid ken panagabusu ti CAFGU.

Didigra iti Sto. Nino

Abril 17, iti Abariungan Uneg. Sinada ken kinulata ti tropa ti 17 IB ken CAFGU ni Edison Erese, mannalon a taga-Abariungan Uneg ken Coordinator ti BAYAN MUNA. Inakusaran da ni Erese a nangipablaak ti polyeto a nangiwaragawag kadagiti dakes nga aramid ti militar iti baryo. Kinamatkamat ken

binutbuteng da met ti kadua na a ni Rocky Cabildo.

Ni Erese ket biktima ti panagbugbog ti tropa ti 41st IB nga indauluan ni Capt. Noli Lapisar idi Marso 2001.

Idi Abril 2, binutbuteng ken binugbog met dagiti tropa ti 77 IB ken CAFGU dagiti Barangay Tanod iti maysa a pasken iti baryo. Dagiti nasao a tanod ket da Reynold ken Randy Balagat, Ronnie Quilit ken Logie Andam.

Dagiti CAFGU a nangbugbog ket da Berlin Melad, Aladin Magalad, Randy Telan, Junior Pakking, ken Zaldy Martin, taga-Abariungan Uneg da amin. Da Reynold Balagat ken Andam ket kinulata da ti bakrang ken dadduma pay a paset ti bagi da.

Dagitoy a CAFGU met laeng ti irekreklamo ti bumaryo a kangrunaan a

manglablabsing kadagiti regulasyon ti baryo mainaig iti panagkalap. Isuda’t kangrunaan nga agus-usar ti sabidong kadagiti karayan ken waig.

Manipud adda CAFGU, agrairan ti panagtakaw. Mapukaw dagiti taraken nga ayup. Inaldaw nga agbartek da. Adda pay pulutan da. Pangalaan da ngarud? Awan met taraken da. Awan pay igatang da. Takawen da ti taraken ti umili.

Agreklamo met ti masa iti patakaran ti 77 IB nga alaen ti numero ti cellphone da.

Idi Abril 22, binugbog da Sgt. Cachuela ken Sgt. Sabado ni Francisco Lazo ti Lipatan. Pabasolen da a nagpapatok kano daytoy iti paltog.

Umuna a lawas ti Abril, bugbog-sarado dagiti nagkukuyog a kabataan a da

Jun Baribad, Martin Agamata ken Jing Ramos ti Brgy. Lipatan kadagiti tropa ti 77 IB PA iti baryo. Pinagsuspetsaan da pay nga agilemlemmeng da ti paltog kano ti NPA.

Pinangtaan dagiti tropa ti 77 IB da Emy Bulosan, Ayet Garcia, Francisco Lazo ken dadduma pay a sibilyan a taga-Lipatan. Gapu ta suporter da kano ti NPA. Binutbuteng da pay a no rumaut kano ti NPA ket isuda ti agsungbat.

Ipilit da kadagiti bumaryo ti Lipatan a paayaban ken marisuten iti kampo ti 77 IB dagiti panaglabsing iti ordinansa ti baryo. Kadawyan na, bugbogen ken kastigoen dagiti soldado ti paayabanda iti kampo.

Reklamo ti Umili iti Rizal

Iti ili ti Rizal, Cagayan, irekreklamo dagiti umili dagiti sumaganad a panaglabsing dagiti tropa ti 77 IB.

Piliten da ti umili a mangted ti libre a serbisyo ken materyales para iti kampo da. Panagtsekpoynt ken panagkariyar da kadagiti sibilyan. Nangruna dagiti masipngetan iti panagawid iti balbalay da. Aktibo dagiti CAFGU nga agigayd kadagiti operasyon militar.

Umuna a lawas ti Abril, binugbog dagiti tropa ti 77 IB ti maysa a barangay tanod iti Zinundungan Valley, ni Vino Laguna. Kalpasan a naibaga na a pumanaw dagiti militar gapu iti panangipilit da nga agrekluta ti CAFGU ken panangidaulo ti bisyo kas ti panagbartek ken panagsugal.

Dagiti met laeng tropa ti AFP ti utek iti ilegal a panagtroso iti lugar.



Nangruna iti Zinundungan Valley. Agsingsingir da ti out-going fee (tong) iti amin nga agtarikayo a lumabas iti Zinundungan, Abariungan Uneg ken Lipatan.

Mapan ti singkuwenta porsyento (50%) iti P10.00 tunggal boardfeet a singsingiren ti baryo. Kakumplot da dagiti buyer ti kayo, sumagmamano nga opisyal ti DENR, ken ti mayor ti Rizal a ni Raul dela Cruz.

Labanan ti kinadangkok

“Awan addang ken interes ti agdama a rehimen US-Macapagal-Arroyo nga itandudo ti pagimbagan ti umili. No di ket depensaanan dagiti asu-aso da,” kinuna ni Ka Crispin.

Interes ti rehimen a lapdan ti panagkaykaysa ti umili tapno awan bileg ken pigsa dagitoy a mangirupir kadagiti pagsayaatan da.”

Inawis ni Ka Crispin ti umili nga agkaykaysa, umaddang, labanan ti panagrekluta ti CAFGU. “Ibulgar ken labanan dagiti abusado a militar ken CAFGU. Protektaran ti interes, saan nga agCAFGU. Protektaran ti interes ti bukod tay a dasig,” kinuna na.

“Sangsangkamaysa nga ikampanya tayo iti nalawa nga umili. Irakurak ken labanan dagiti kinadakes nga aramid. Suppiaten ti ranggas-militar. Suppiaten ti panagrekluta ti CAFGU.

“Hustisya para kadagiti naranggasan. Pagbayaden dagiti naranggas a militar ken CAFGU. Isaklang dagitoy iti rebolusyonaryo a Pangukuman ti Umili. Pagiggeman ti bukod tay a bileg ken karbengan. Itakderan ti naimbag ken nalinteg,” panangrikep na. **B**

Ibayog ti Armado a Dangadang! Rebbeken ti Kabusor!

*Palagip kadagiti sibilyan ken ballaag kadagiti kameng ti CAFGU manipud iti
NPA - Danilo Ben Command, Cagayan*

Palagip kadagiti sibilyan

Palagip tapno makaliklik iti peggad ti biag ken sanikua ti masa iti panawen nga agirussuat ti New People's Army ti taktikal nga opensiba. Wenno aniaman nga aksyon militar.

1. Saan nga ipausar iti AFP dagiti bukod a lugan kas ti traysikel, kuliglig, jeep, trak ken dadduma pay.

2. Saan a sumakay iti lugan ti militar. Ken saan a pasakayen ti militar kadagiti naglugaran ti sibilyan. Padissaagen ti militar no sumakay da. Wenno dagiti sibilyan ti dumsaag ken umakar iti pagsakayan. Irupir daytoy a karbengan. Agprotesta no kasapulan.

3. Saan nga itulok nga agkampo ti militar iti baryo. Nangruna kadagiti kabalbalayan, eskuelaan, ermita, ospital, barangay hall ken dadduma pay a pasdek pangpubliko. Tapno nawaya nga iwayat ti umili dagiti aktibidad ken karbengan da nga awan ti pakasingaan ti panunot ken peggad iti seguridad da.

Ballaag kadagiti CAFGU

Dagiti aktibo a CAFGU, civilian informer, gayd ken agar-aramid ti kontra-umili ken kontra-tignayan ket agsardengen ken agilinteg itan ta adda pay gundaway da.

Kasta met a palagipan mi nga agsardengen dagiti agtatakaw ti sanikua, agrames ti babbai, ken aglako ti droga. Ken dadduma

pay a langa ti anti-sosyal nga aramid a mangriribuk kadagiti umili. Saanen nga urayen a dumagsen dagiti kaso a maaramidan da.

Ti kinarigat ket saan a marisut babaen kadagiti madi nga aramid. Kasayaatan na, lumaok ken itandudo ti armado a dangadang a manggibus iti bulok a sistema. Nga iturturayan dagiti agari-ari a dasig. Daytoy ti puon ken gapu ti sagsagabaen tayo a kinarigat.



Saan nga agpausar iti kabusor iti dasig. Saan a dangran ti pada a nakurapay. Pagserbian tayo ti bukod tay a dasig a magungundawayan.

Awan sabali a mangilaban iti karbengan ken kalintegan, no di datayo a magungundawayan. Datayo ti mangbukbukel iti pakasaritaan ti gimong. Datayo ti mapangngeddeng tapno baliwan ti kasasaad.

Saan nga agpangaddua. Ibayog ti rebolusyonaryo a tignayan! Pairuten ken pabilgen ti panagkaykaysa. Ilaban dagiti demokratiko nga interes ti umili. Gun-oden ti pudno a wayawaya ken demokrasya.

**Crispin Apolinario
Tagapagsarita
NPA-Danilo Ben Command
Western Cagayan
Abril 2002**

Panangtallikud iti Serbisyo a Pangsalun-at

Nangitinnag ti Memorandum 06 ti pangprobinsya a gobyerno ti Isabela a mangitipon kadagiti klinika ken babassit nga ospital iti dakdakkal nga ospital iti probinsya. Panggep kano a mapadur-as ti serbisyo a pangsalun-at ti umili. Ti kinapudno na, panangipaidam daytoy iti basaran a serbisyo iti ad-adu nga umili iti aw-away.



“Saan a makatao! Saan a nainkalinteg! Kasano kamin? Nakirang la ngaruden, iyad-adayo da pay. Awan pulos asi na!”

Daytoy ti sangsangkamaysa nga imbutaktak dagiti mannalon a nagprotesta iti panangiserra ni Gobernador Dy iti sangapul nga ospital iti Isabela.

Nagsasaruno a nairussuat ti tignay protesta da. Idi Abril 14 iti kapitolyo. Mayo 4 idiay Roxas. Ken idi Mayo 6 iti San Mariano, Isabela. Nasurok dua a ribo ti dimmar-ay iti tignay protesta iti Sentro San Mariano.

Prinotesta ti umili ti addang ni Gobernador Dy. Supsuportaran ti umili ti panagtignay dagiti mangmangged medikal babaen iti panangirussuat da ti rali kontra iti pribatisasyon.

Panagkissay ti serbisyo

Dagus a sinuppiat dagiti mangmangged iti salun-at daytoy memorandum. Gapu ta maiserran dagiti sangapul nga ospital.

Inrasonan daytoy ni Gobernador Dy iti panangibaga na a saan a panangiserra, no di panangipaima kadagiti gobyerno munisipal ti mapasamak.

Ti kinaagpaysona, awan naan-anay a pondo iti salun-at nga iggem dagiti munisipyo. Isu nga iti kamaudianan na, mapilitan da nga isara dagitoy nga ospital ken ilako kadagiti pribado a negosyante. Ngumina ti serbisyo iti salun-at, ad-adda a maipaidam ti karbengan ti umili nga aglak-am ti serbisyo.

Ti kinapudno iti gakat a merging

Sangapul nga ospital ti mairikpan segun iti plano a merging wenno panagitipon (kitaen ti boxed). Kaaduan

kadagitoy ket nakapuesto iti sulsulineken a lugar iti Isabela. Pagpaagasan dagiti adu a pamilya ti mannalon kadagiti kaso ti emergency ken kadawyan a panagsakit.

Ti sigud a nakirang a serbisyo iti salun-at ti gobyerno kadagiti umili ti Isabela ket nakaron a maipaidam kadakuada. Umadayo dagiti ospital kadagiti umili. Lalo pay a ngumato ti gastos iti panagpaagas da.

Gapu ta narigat ken adayo ti dalan a mapan kadagitoy nga ospital, makissayan ti gundaway a dagdagus a masungbatan dagiti emergency a kaso. Gumastos ti adu a kuarta iti plete. Saan laeng a maapektaran dagiti pasyente no di karaman dagiti mangmangged iti salun-at a maikkat.

Mangidasdasar ni Gobernador Dy ti Early Retirement (Nasapa a Panagretiro) kadagiti mangmangged a

maapektaran ti merging. No saan da a nasapa nga agikakat iti serbisyo, mapukawan da met ti trabaho.

Maiduron ngarud dagitoy a mangmangged iti pribado a panagserbisyo iti salun-at. Nupay nakasagana da koma latta a mangtaripato kadagiti pasyente kadagiti pangpubliko nga ospital.

Makissayan ti bilang dagiti mangmangged kadagiti ospital segun kadagiti panagbaliw ti istap ditoy. Manayunan met ti dagsen ti trabaho. Saan nga agnayon ti agtrabaho ditoy uray no umadu ti pasyente iti mapasamak a panagtinnipon.

Agbugbugsot a kasasaad ti Serbisyo

'Modernisasyon' ti awag ditoy ni Gobernador Dy ken kakumplot na iti gobyerno. Ngem saan a risuten daytoy ti nabayag a kinakirang ti serbisyo para kadagiti umili.

Pilien da nga agkissay kadagiti ospital tapno maallukoy dagiti negosyante nga agnegosyo ti kastoy. Bassit ti pondo a maituding para iti salun-at iti tinawen a badyet ti gobyerno. Malaksid pay iti maikissay a mapan kadagiti bulsa dagiti pulitiko.

Aktibo a supsuppiaten dagiti umili ti plano a panagtipon dagiti ospital. Ken ti kanaig a resulta na iti panagkissay kadagiti mangmangged ken panangipaidam ti serbisyo iti salun-at kadagiti barbaryo.

Kidkiddawen da ti nayon a badyet para iti salun-at. Imbes a pagbayad-utang kadagiti imperyalista a pagilian ken pagpabussog kadagiti tropa ti reaksyunaryo nga AFP. **B**

DAGITI IMPASERRA NI GOBERNADOR DY NGA OSPITAL ITI ISABELA

Elvin Masigan Municipal Hospital, Sta. Maria

agserbisyo iti 20 a baryo; itipon iti Cabagan a maysa oras ti kaadayo; bumallasiw pay iti Cagayan River

Quezon Emergency Hospital

agserbisyo iti 15 a baryo; itipon iti Roxas, 23 kilometro ti kaadayo

Quirino Medicare and Community Hospital

agserbisyo iti nasurok 15 a baryo; itipon iti Roxas, maysa nga oras ti byahe

San Antonio Municipal Hospital, Ilagan

agserbisyo iti 20 a baryo iti Daya nga Ilagan, itipon iti Provincial Hospital a 15 kilometro ti kaadayo *(iti maudi a padamag, baklayen ti munisipyo ti Ilagan ti panangpataray iti ospital. Agbalin a 5-bed ospital laengen manipud 10-bed. Saan a naiyakar ti pondo na manipud iti probinsya.)*

San Mariano Medicare and Community Hospital

agserbisyo iti nasurok 36 a baryo, itipon iti Provincial Hospital a 35 kilometro ti kaadayo

Faustino Dy Emergency Hospital, Villa Concepcion, Cauayan

agserbisyo iti nasurok 25 baryo iti Forest Region ti Cauayan; itipon iti District Hospital. Maysa ket kagudua oras ti byahe manipud ditoy, narigat pay ti rummuar a lugan

San Guillermo Emergency Hospital

agserbisyo iti 26 a baryo; itipon iti Echague; 30 kilometro ti kaadayo ken narigat ti pagluganan

Jones Medicare and Community Hospital

agserbisyo iti 42 a baryo; itipon iti Echague a nasurok maysa oras ti kaadayo

Martsa-Rali Kontra iti Dinastya Dy, Nairussuat

“PADISIEN NI DY!” “DY, PESTE ITI umili!” “Labanan, paayen dagiti kontra-umili a proyekto ni Dy!” “Labanan ti kumarkaro a pananglipit iti karbengan a kas tao!” “Isardeng ti panangiserra kadagiti ospital!” “Isardeng ti rekrutment ti CAFGU!”

Dagitoy ti sumagmamano laeng iti adu a pukkaw ken nakasurat a placard dagiti umili idi Hunyo 7. Inangay dagiti mannalon ti tignay protesta laban kadagiti kontra-umili ken kontra-mannalon a proyekto ni Gobernador Dy kas ti cassava plantation project, coal mining ken coal-fired power plant, Bt corn, panagserra iti sangapulo nga ospital, kumarkaro a militarisasyon ken panangitakder ti CAFGU ken CVO.

Dinar-ayan daytoy ti nasurok uppat a gasut a mannalon, mangmangged, propesyonal, estuyante, dagiti tao ti simbaan ken dadduma pay a sumupsuporta iti kiddaw dagiti mannalon. Adda met ti delegasyon dagiti mannalon a naggapu iti Cagayan ken Nueva Vizcaya.

Nairut a nakasilpo ti tignay protesta iti pangpagilian a mobilisasyon kontra iti rehimen ni Gloria Macapagal Arroyo ken iti panangkondenar iti kinainutil ti Comprehensive Agrarian Reform Program (CARP).



Rali ti umili kontra iti dinastya a Dy iti Maharlika Highway-Baligatan, Ilagan, Isabela.

Umuna a nagtitipon dagiti delegasyon ti nadumaduma nga organisasyon ti mannalon iti Diocesan Social Action Center idi Hunyo 6. Ditoy, nangirussuat da ti forum ken panagadal mainaig kadagiti nalalatak nga isyu ti mannalon.

Alas nuebe ti Hunyo 7, nagmartsa da manipud DSAC nagturong iti Bonifacio Park ti Baligatan, Ilagan, Isabela. Ditoy a nairussuat ti programa.

Kinondenar dagiti nadumaduma a lider mannalon manipud Cordon, Benito Soliven, Naguilian, Cauayan, San Mariano, Mallig Region ken dadduma pay nga ili dagiti nadumaduma a kontra-mannalon a proyekto ni Dy. Kas ti cassava plantation project, coal mining and coal fired power plant, Magat River Project ken ti panangitakder ti CVO ken CAFGU. Kasta met a kinondenar

da ti panagserra ti sangapulo nga ospital.

Inrupir da ti panangpadisi kenni Gobernador Dy nga akin-utek kadagiti kontra-umili a proyekto.

Linapdan dagiti pulis a naggapu pay iti PNP-Cauayan ken PNP Provincial Command ti martsa agturong iti kapitol ti probinsya. Plano dagiti nagmartsa nga agrussuat ti programa iti sango ti kapitolyo. Nasurok dua nga oras a hinarangan dagiti pulis ti nagprotesta agingga nagdispers da.

Idi Hunyo 10, adda met napan a delegasyon dagiti mannalon a dimmar-ay iti tignay protesta a nairussuat iti Mendiola. Indanon da iti nasao a tignay protesta iti Manila ti nalaus a diskontento dagiti umili ti Cagayan Valley iti rehimen a US-Arroyo. **B**

Protest Caravan Kontra Cassava, Binangenan

Binangen dagiti tropa ti AFP ken PNP ti caravan kontra cassava a nangrugi manipud Quirino ken agturong iti Ilagan, Isabela idi April 23.


Dua a daras a tsinekpoynt dagiti tropa ti PNP ken AFP ti caravan. Awan ti name plate dagiti soldado a nangsada kadakuada. Saan da pinalubosan dagiti mannalon a naggapu iti Mallig Region a makadanon iti Ilagan a pagpatinggaan ti caravan.

Kinumpiska da dagiti permit dagiti nagluganan dagiti mannalon. Out of way kano dagiti naglugananda. Ingapilitan a nagsubli da iti naggapuan da.

Nalawag a pananglipit laeng daytoy tapno lapdan dagiti mannalon a mangipaduyakyak ti panangsuppiat da iti proyekto ti Cojuangco-Dy.

Sumagmamano laeng ti nakadanon iti Diocesan Social Action Center a

nagirusuatan ti maysa a press conference. Ditoy nga imbutaktak dagiti natakwatan da a nasaknap a panagagum ken nakaro a panangranggas kadagiti sumupsuppiat iti proyekto.



“Dadakkel a tao ti kalaban. Saan da kayat nga idanon mi ti resulta ti fact-finding mission a nangtakuat iti nakaro a panagagum iti daga,” kinuna ni Minnie Lopez, secretary general ti KMP - National.

Dinar-ayan dagiti mangibagbagi ti nadumaduma nga

organisasyon ti mannalon iti tukad nasyonal ken lokal ti FFM ken ti caravan. Kas ti Kilusang Magbubukid ti Pilipinas, Sentro para sa Tunay na Repormang Agraryo, Rural Missionaries of the Philippines, Network of Agrarian Reform Advocates ken dadduma pay. **B**

Dr. Catembung, 12 pay, sinuspinde ni Gob. Dy

Sinuspinde ni Gobernador Faustino Dy ni Dr. Antonio Catembung ken 12 pay nga empleyado kalpasan ti inrusuat da a rali kontra iti merging dagiti pampubliko nga ospital idi Abril 17 iti kapitolyo ti Ilagan. Saan kano a dimmawat ti Leave of Absence dagiti empleyado a nag-rali.

Prinotestaan ni Dr. Catembung ti pannakasuspinde ken ti saan da pannakaawat ti sueldo. Kinuna na, “nainkalintegang ken karbengan a konstitusyonal nga ipaduyakyak ken protestaan ti makitkita mi a kontra-umili nga addang ni Dy. Saan a pagbasolan daytoy.”

Kameng ti Alliance of Health Workers (AHW) dagiti nasuspinde nga empleyado ti ospital. Indauluan ti AHW ti tignay protesta a dinar-ayan ti dadduma pay a sektor.

10 a community hospital iti probinsya ti Isabela ti impaserra ni Gobernador Dy.

*(Iti maudi a padamag, naballigian a nairupir dagiti nasuspinde nga empleyado ti karbengan da. Imparang ni Gobernador Dy a pinakawan na kanon dagiti nasuspinde nga empleyado. Ti kinapudno na, awan nagbasolan dagiti empleyado. Nainkalintegang ngarud a maisubli ida iti trabaho ken maawat da pay ti dua bulan a sueldo da.). **B***

CFA, kinasoan ti arson

Indarum ti pamilya Roque iti arson ti sangapulo ket pito a mannalon a kameng ti Caquilingan Farmers Association (KFA) iti Diadi, Vizcaya. Maikadua a kaso daytoyen a naisampa iti reaksyonaryo a korte kontra kadakuada. Idi Oktubre, 2001, ket kinasoan da ida ti trespassing.

Ipabasol da a pinuoran kano dagiti mannalon dagiti mula a mangga dagiti Roque. Nasurok a sangapulo kano a mangga ti napuoran.

Dagus a sinuppiat dagiti mannalon daytoy a pammabasol. "Saan a pudno dayta akusasyon da. Awan uray maysa a nauram a mangga. Nalaylay iti nakaro nga init. Nagpuor kami iti uma mi laeng," kuna ni Ben Cardenas, daulo dagiti mannalon.

Paset dagitoy ti panangririkub kadagiti mannalon. Nabayagen a kayat da Roque a papanawen dagiti mannalon. **B**

Ti dangadang dagiti mannalon iti Caquilingan

DAGITI MANNALON TI ADDAAN KARBENGAN ITI DAGA

Nainkalintegan ti laban dagiti mannalon ti Caquilingan. Manipud pay 1948 pinosisyonan, dinalusan ken in-inut a pinadur-as da ti 300 ektarya a daga. Ti sigud a kabakiran, katanubungan ken kabayabasan ket nagbalin a pagtalonan.



Kalpasan a napadur-as dagitoy a dagdaga, nagparang ti pamilya Roque (Rufino Roque Sr.). Kukua da kano ti pinusisyonan dagiti mannalon. Gapu iti kinabaknang ti pamilya Roque, naaramid da nga iturayan dagiti mannalon. Naasideg da kadagiti opisiales ti gobyerno kas iti DAR, DENR ken AFP. Managpannakel da. Isuda met ti mapabpaboran idinto a dagiti agbanbannog ti maawanan karbengan. Awan nabalinan dagiti mannalon aglalo iti innabugaduan.

Intinnag ti pamilya Roque ti sistema a bingayan nga apagkatlo (1/3) kada apitan. 1950 ket nangruging nga agabang dagiti kasamak. Dagiti nagsagrap kadagitoy nga abang ket dagiti tagatawid ni Rufino Roque Sr. - Napoleon, Jose, Fe Paulina, Amelia Roque ken dagiti naikamang kas kada Antero Hermosura, Dr. Reymund Abella, Pastor Artemio Villaluz, Sr., Pedro ken Pacifico Vermusa.

Iti uneg ti 51 a tawen, addan ti naiyabang dagiti 25 a pamilya a 12,750 a sako ti irik. No kuentaen, nasurok-kumurang P4,100,000 (kabatog ti 586,500 kilo).

Idi 1998, binaliwan ti pamilya Roque ti sistema ti bingayan. 10 porsyento (pabor iti Roque) ti apit ti maiyabang. No iti uneg ti dua tawen a saan nga agtungpal dagiti kasamak ket maikkat da kas kasamak.

Saan nga immannugot dagiti kasamak. Inrupir da ti kalintegan da iti daga. Binukel da ti Caquilingan Farmers Association wenno CFA tapno papigsaen pay panagkaykaysa da.

Rinuggian metten ti pamilya Roque ti panagranggas. Pinilit da a papanawen dagiti mannalon. Naminsan a pinaputukan ni Napoleon Roque ni Virgilio Esteban. Kasta met a namindua a ginandat a paltugan ni Dr. Reymund Abella ni Edgar Cuagdan ngem saan a pimmutok ti paltog. Pinaturungan ti paltog ni Pastor Artemio Villaluz ken dagiti aso-aso na ni Arthur Gorospe ken ti asawa na idi mapan da iti kuman da. Idi panagapit da Arthur Gorospe, innala latta ni Pastor Villaluz ti agarup kaguddua ti apit nga mais nga awan pakada.

Iti laksid kadagitoy a pasamak, saan a nagbuteng dagiti mannalon. Nalawag kadakuada ti panangallilaw ken pananggundaway ti pamilya Roque. Dakkel a sakripisyo, bannog ken gatad ti naited dan kadagiti apo't daga. Idinto nga awan pulos ling-et, bannog ken dara a nagtedted manipud kadakuada.

Idi 2001, insardengen ti CFA ti panagbayad iti abang. Daytoy ket maysa a naitured ken nainkalintegan nga addang. Rumbeng nga ituloy ti dangadang. **B**



ARIEK

Tapno makaliklik iti amin a sakit, masapul ti kinadalus iti bukod a bagi ken aglawlaw. Ti panagariiek ket kadawyan a maala manipud iti narugit a bagi ken aglawlaw. Lalo no agkaiwara ti takki ti tao ken ayup.


“Adu met ti kanen da. Ngem nagkukuttong da latta.” Daytoy ti kadawyan nga obserbasyon dagiti nagannak no apay a nakuttong dagiti ubbing. Mabalin nga adda ariek da.

Kasano a malasin nga adda ariek? Naduma-duma a sintomas ti marikna ti pasyente. Depende iti tukad ti impeksyon iti bagi. No nakadanon ti larva ti ariek iti bara, marikna ti narigat a panaganges, panaggurigor ken panaguyek.

No bassit laeng ti bilang ti ariek iti bagi, mabalin nga awan pulos marikna a sintomas. Ngem no adun, agsakit ti tiyan. Saan a matunawan iti taraon ken

agburis.

Kadagiti ubbing, nalaka a makita ti sintomas ti ariek. Nakuttong ken dakkel ti tiyan da.



Taray ti sakit ken dagiti mabalin a komplikasyon

Inggana a saan a mapurga, ti ariek ket agtultuloy nga agitlog ken mabalin nga agwaras iti dadduma pay a tao.

Kumaro met ti malnutrisyon ken panagbebessag ti ubing no adu ti ariek iti tiyan na.

No adu unay ken saan a maag-agasan, agpangato dagiti ariek iti ngiwat ken agong. Mabalin met a mapan da iti apro ket agamarilyo ti kudil ken mata. Agsakit ti tiyan. Makagapu met daytoy iti appendicitis no dumanon iti appendix ti bagis.

Panagliklik

Pagtalinaeden tayo a nadalus ti aglawlaw tapno maliklikan ti ariek. Agusar ti kasilyas. Agbuggo ti ima sakbay a mangan. Aglalo no naggapu tayo iti panagtrabaho iti daga. Ken kalpasan a nagusar iti kasilyas. Agusar ti tsinelas, sapatos wenno bota no magna iti parparaangan nga agkaiwara ti takki ti tao wenno ayup.

Panagpurga

Ti nabuksilan a bukel ti lukban wenno sua ket mabalin nga in-inot nga ipakan kadagiti ubbing tapno mapurga. Wenno ti bunga ti “tartaraok.”

Adda met sumagmamano nga agas a pangpurga, wenno pangparuar ti ariek iti tiyan. Ti kasayaatan na, ikonsulta iti opisyal medical ti BHB. **B**



ESPESIAL NGA KURSO NA KUSECHERO

MEKA - 9: Y REHIMEN NI FIDEL V. RAMOS

Sinaddaggan anna mas pinaddammo paga na pammaguray ni Ramos ngamin y patakaran, programa anna krimen ira nga kontra ta kusechero

Firmi nga kontra-kusechero y patakaran nga nepatuppal na rehimen ni Ramos. Maski panagappappe onu panangilloku laman, awan ta prayoridad naw y bogus nga reporma ta davvun. Ta programa nga Philippines 2000 anna ta pattallun ta General Agreement on Tariff and Trade/World Trade Organization (GATT/WTO), maggi awan ngana tu nabattang ta CARL.

(1) Y Philippines 2000

(a) Nabaddi y produksyon ta mula ira kagitta na ammay anna mangi, anna nangngina y presyo naw. Segun ta lay nga *High Value Crops Production Act (RA 7900)*, me-convert y alawa nga parte na 5 nga milyon ektarya nga kammayan anna kakomangan (kamangitan). Y 3,100,000 ektarya ay pinabbalin da nga pakkusechan para ta *high value export crops* anna karuan paga nga me-export kagitta na lappaw ira, asparagus,

rubber tree, kapo, baka, lasi, anna karuan paga. Insigida nga nelisi yaw ira ta sakup na CARL. Minilyon nga kusechero y awan tu pakkusechan. Firmi nga neyazzazzil ira ta darakal nga kumprador anna usurero.

(b) Ta unag na *RA 7881*, interamente nga nelisi ta sakup na CARL danuri asyenda anna korporado nga pakkusechan para ta export nga mula, danuri fishpond para ta manango anna sira, lasi, poultry, piggery, danuri rantso anna karuan paga. Maturu 2.8 milyon nga ektarya y insigida nelisi. Maski danuri alalawa nga davvun na Iglesia Katolika ay nelisi ta sakup na programa.

(c) Nelisi ta CARL danuri davvun nga neparenda ta dayu nga negosyante. Dorob na lay nga *Investors' Lease Act (RA 7652)* nga meddan ira paga tu pakawayya nga marrenta tu davvun ta Filipinas magadde ta 75 ragun.

(d) Megafu ta pattali ta keyosan nad davvun ira (*land use conversions*), limmawa y davvun nga nelisi ta CARL anna aru y napapanaw nga kusechero. Danuri

pakkusechan ira ay pabbalinad da nga industriyal, komersyal, residensyal (subdibisyon) anna para ta turismo.

(e) Pabalbalinad da nga pribado y alawa nga davvun a publiko.

Naaprubaran danaw tumunug nga lay:

Fishpond Lease Agreement (FLA) - mabalin nga rentan na pribado nga korporasyon ira (lokal anna dayu) danuri aggig na bebay tapenu pappataddaggan ira tu fishpond para ta manango anna lasi.

Integrated Forest Management Agreement (IFMA) - meddan tu pakawayya danuri pribado nga korporasyon (lokal anna dayu) nga pabbalinad da danuri erya na reforestasyon para ta plantasyon na kayo anna para ta tabla.

Mining Act (RA 7942) - mangiyawa tu pakawayya anna insentibo tapenu tagikuan na dayu ira y davvun a sakup na pakkokkotad da tu mina.

(f) Segun ta proyekto nga *Sugar 2000*, malattu ta trabaho y napakaru nga makikusecha anna makisuerdo ta pammulan tu una megafu ta pattallun na bagu nga makinarya.

(g) Firmi nga pinabaddi da y fundu para ta CARP. Ta 1994, maturu walu nga bilyon yaw. Ta 1995, maturu nga appa nga bilyon ngana laman y badyet.

(h) Ta 1994, ina uli na gubyrno y CLOA anna CLT na 22,000 nga kusechero ta 32,000 ektarya nga pakkusechan. Nagadde ta 18,000 ektarya y nareklasipika na lokal nga gubyrno ira.

Imbes nga meddan tu davvun danuri kusechero ira, mas pinagurayan na Philippines 2000 y panafu ta davvun na masa nga kusechero. Nabi nga narekonsentra mangana y davvun ta piga laman nga pappatulan na davvun, darakal nga kumprador burgesya, anna dayu. Imbes nga pakastan na y pattolay na intero nga magili, firmi nga pazzigariga y nepassissim na Philippines 2000. Y ziminakal ay y benepisyu na mammaguray ira.

Nepatuppal kada konggresyunal nga distrito y Agrarian Reform Communities (ARC). Ngem pangilloku laman ta kusechero yaw. Arianna mabalin nga tagikuan na kusechero ira danuri davvun nga sakup naw.

Mepatuttul taw y sistema nga buwisan (pavvugi) anna mekumkumbinsi y pammula tu mula nga para eksport. Danuri iparaparayag da nga proyekto para ta suporta nga serbisyo ARC ira ay suporta ollu labbi para ta pappatulan nad davvun ira.

(2) Y pattallun na Filipinas ta GATT anna WTO

Y GATT ay danuri “nattulagan” ira ange ta libre nga pallakuan nga sumakup ta maturu 100 nga ili, onu 90% na pallakuan ta intero mundo. y WTO ay organisasyon nga

nepataddag na ili ira nga miyembro ta GATT. Pinadday yaw na imperyalista tapeno idikta da ta baraddi anna makafi nga ili ira y kaya da nga sistema na pallako ta produkto ira.

Y korianan nga “nattulagan” ay naapruba ta 1994. Tubba na US anna karuan nga imperyalista yaw nga “libre nga pallakuan” nga pammakappianan kano na ngamin nga magili ira. Y kakuruganna, mapilitan danuri baraddi nga ili kagitta na Filipinas nga malattu y anni laman nga nabattang nga proteksyon laban ta pattallun na dayu nga produkto, kontrol ta ekonomya, yammano ta agrikultura. Kagitta na proteksyon na taripa (vugi) ira para ta imported nga produkto, subsidyo para ta agrikultura anna karuan paga nga produkto nga para export, anna y kontrol na gubyrno ta naddumaruma nga aspeto na ekonomya kagitta na pinansya, sueldo, anna serbisyo publiko.

Manawag nga nepasingan na maggi 100 ragun nga kapadasan na Filipinas no anni y resulta na “libre” nga pallakuan ta US anna karuan paga nga imperyalista. Firmi nga megalu y ekonomya na ili ta kolonyal nga pallakuan, medanodano ta gatu ta dayu ira, anna arian na makapanaw na magili ta fuyo na zigariga nga resulta na pangiyazzazzil na dayu ira. Arianna mabbibbig y soberanya na ili anna katunungan na pammaguray nga magitadday.

Firmi y pazzigariga na magili nga kusechero megafu ta nattulagan ira ta GATT :

(a) Interamente nga liberalisasyon anna pag-import onu pallattu ta nabattang nga proteksyon na lokal nga

produkto ira nga agrikultural. Narresulta yaw tu pannaka-laggabban tam ta imported nga produkto ira. Arianna kaya nga makikumpitensya na lokal nga produkto ira.

(b) Pinagurayan na gubyrno y responsibilidad na nga mangiyawa tu suporta ta agrikultura kagitta na subsidyo ta ammay, mangi, pestisidyo, anna karuan paga nga serbisyo kagitta na padanum anna pagatu. Ammun naw y patakaran nga deregulasyon, pribatisasyon nga netannag na GATT. Nu kunnari gafu, y kusechero ira ay firmi nga meyazzazzil anna medanadano na pappatulan na davvun ira anna darakal nga kumprador burgesya.

(c) Pinalawa y sakup na Karapatan ta Pattagikua nga Intelektual (Intellectual Property Rights wenno IPR) nga medalan ta patent, kapi-rayt, anna treydmak. Yaw y karapatan ta eksklusibo nga produksyon, pagkopya, pallako, pakeyosan anna pappakasta ta merehistro ira nga materyales anna proseso.

Meponag taw y bagu ira nga nadiskubre onu napakasta nga binni, mula, ayam, anna karuan paga, nga gagangay nga nerehistro kagitta na kukua nga mawag na korporasyon a multinasyunal.

(d) Pallattu ta nabattang nga regulasyon nga magamma ta pannegosyo ta akuakultura. Makumbinsi nga tullun danuri korporasyon anna darakal nga pappatulan nad davvun ta produksyon para ta eksport na lasi, salmon anna seaweeds. Mapapanaw y baraddi ira nga makfafu ta danum ira anna malattu y pakawayya da nga mabbenepisyu ta danum. **B**

NATURED KA KADDUA


(Para kenni Ka Rhett)

Insurat ni Ka Lena

Saannak a mannaniw
wenno mannurat,
manmano pay ngarud nga agsuratak
Diak ngarud mailawlawag
no apay nga ita ket agsursuratak
Ngem napinpintas met ketdi
nga isursuratko ti adda ditoy kaunggak
ngem ti personal nga ibagak
gapu ta saannak met ngarud a mannaniw

Maragsakanak unay
iti panangisublim ti ID'm idiay balay yo
Ammo tan a dua ti kaipapanaan daydiay...
Dayawek ti binalikas ti surat mo iti inam
nga ipagballigim ti rebolusyon

Natan-ok ken bannuar ti pinilim
a pangserra a balikas
Isurom met kaniak no sadinnom nga inadaw
tapno masursurok met ken maiyaramid



Natured ka, saan ka a takrot
Natured ka iti panangibalikas mo a sika ket
tomboy,
iti takder mo nga agtalinaed ka iti rebolusyon
Natured ka iti iyaadayom
iti ipatpateg mo nga ina ken kakabsat,
dagiti barkadam nga agtutubo iti syudad,
sine, paborito a makan
ken adu pay

Natured ka, kaddua

TANO

